

道光戊申秋鐫

保甲書

楚興國李煒校刊

SWT1/66329

敘

今之為吏者類稱惠於撫信於使智於計
敏於為神於撻發而威於彈壓而或徒善
不足以敷其意孤行不足以舉其政過峻
不足以制其民則惑求一法焉以輔心思
材力之用以綜委曲繁重之數以備正變
緩急之策而後可以御秀頑兼教養綱維
庶政優優焉由分而得合此我

致初先生保甲書之所由輯也 先生學
有統宗治該本末其於保甲獨能探周官
精意以立千古制治之原而其書則不拘
方隅不設成見參百家之異同成一心之
經緯廣其義類窮其源流析其條理聯其
脈絡保甲之大成於是集吏事之典要於
是詳矣夫世之言保甲者非涉於迂濶即
蹈於繁冗而世之行保甲者非苦於糾紛

即嫌於遏抑於是以治世良規視同縛人
死法其尤繆者且或率其膠柱鼓瑟之見
肆為因噎廢食之論謂行之而約束太嚴
非惠也期會太數非信也鉤稽相尋智近
於苛官民交迫敏近於蹙況以耳目之司
賞罰之權悉舉而畀之二三鄉長一有所
蔽則俱蔽一有所弛則俱弛神於何有威
於何有噫嘻是皆未得其行之之法耳煒

讀保甲書而思其所難圖其所易竊謂法
之治民者必無不便於民法之宜古者亦
無不宜於今謂保甲不可行而漫議之是
不舟不車而非輪梓不釜不甑而非陶冶
不知政者也謂保甲可行而仍疑之是載
於舟車而非輪梓食於釜甑而非陶冶不
知為政者也茲書所輯酌古而準今集思
而廣益析之為衆保甲可也併之為一保

甲亦可也蓋保甲可經可權可大可小得其一端即各因其才分之高下幅員之廣狹事勢之夷險以期於隨地而奏功若乃尋其節目觀其會通執兩而用其中充類以至於盡有前後如一轍者曰不煩不擾而已有彼此不相襲者曰因地因時而已化以漸推而漸廣法亦愈行而愈密曰有序而已功要於有利無弊事戒其有名無

實曰立誠而已然則此法既行而上下相
維紀綱清肅不言惠而膏雨自流不言信
而桴鼓自應不言智而會計自當不言敏
而簿書自理不言神威而鬼蜮自消萑苻
自靖此衆美之所以畢臻而羣言之所為
一貫歟煒非能推闡保甲者第仰窺夫
先生之深心定旨於簡易取效於便宜握
機於任人歸本於盡職其蒐羅所及不知

吐幾糟粕捐幾筌蹄而後得成是書以為
功於吏治也因請於先生而梓之版既
竣謹拜手而識諸簡端

昔道光二十有八年歲在戊申孟秋上浣
前咸甯令楚興國李煒敬譔

保甲書自序

保甲法甚約而治甚廣陽明先生謂循此而潤色修舉之則一邑之治可以不勞而致諒哉言乎議者往往專以爲弭盜設蓋亦未之思矣我

國家功令所布與文獻所遺犁然燦然宏纖畢具奉以敷政何廢不興予方有牧令書之輯因先集保甲四卷首定例尊

今也次成規備式也次廣存充類也終原始監古也詳求其利弊功效無欲速無徇名無泥古設誠於內而致行之是所望於實心爲民者例言俟入牧令書

道光十有七年丁酉春二月古遂州徐棟題於京邸之伴琴鶴軒

受業

程恭壽

校字

王發桂

保甲書總目

卷一定例

卷二成規

卷三廣存

卷四原始

保甲書卷一

定例目錄

戶部則例

刑部條例

保甲書卷二

成規上目錄

保甲事宜稿

葉佩蓀

清查保甲說

葉世倬

越中從政錄保甲事宜

王鳳生

保甲書卷一

古遂徐棟致初輯

戶部則例民壯附後

一京城內外分別旗民一體編查保甲其王公滿漢文武大臣官員第宅各令自行查察如給使人役內有來歷不明形跡可疑者立即送究

一京城內外編查保甲分別造冊居民舖戶造立循環簿按年更換客店車行菴觀寺院設立清冊兩月更換一次園觀居樓優伶寓所另立專冊一月更換一次五城御史督率所屬分款實力稽查

傷甲書 卷一
一王貝勒貝子公閒散宗室屬下屯居包衣人丁均令州縣編入保甲就近管束其八旗宗室覺羅等在京外附近居住者該州縣官一體編查如有違犯詳明上司官移咨在京該管衙門查辦

一順天府五城所屬村莊暨直省各州縣城市鄉村每戶由該管地方官歲給門牌書家長姓名生業附註男丁名數不及出註婦女所往入稽所來有不遵照編掛者治罪十戶爲牌奇零散處通融編列立

牌長十牌爲甲立甲長十甲爲保立保長限年更代以均勞逸士民公舉誠實識字及有身家之人報官點充地方官不得派辦別差以專責成凡甲內有盜竊邪教賭博賭具窩逃奸拐私

鑄私銷私鹽、躉麪販賣硝磺并私立名色斂錢聚會等事及面
生可疑形迹詭秘之徒責令專司查報戶口遷移登記並責隨
時報明於門牌內改填換給門牌甲保各長果能稽察詳慎首
報得實酌量獎賞倘應查不查應報不報按例分別治罪鄰省
鄰縣差役執持印票到境拘拏盜逃等犯保甲長密同捕獲免
其失察之罪若差役誣執平民許保甲長赴本管官剖白候奪
倘係玩庇按律究治凡地方官奉行保甲若虛文塞責濫任匪
人或更藉端滋擾者題參議處

凡紳衿之家與齊民一體編列聽保甲長稽查違者照脫戶律
治罪地方官徇庇照本例議處凡僉充保甲長並輪值支更看

棚等役紳衿免充齊民內老疾寡婦之子孫未成丁者亦俱免派兵丁書役與民戶同編本身免充保甲長

一凡聚族而居丁口衆多者准擇族中有品望者一人立爲族正該族良莠責令察舉

一旗民雜處村莊一體編次將旗分戶名并所隸領催屯目註明牌冊旗人有犯許民人舉首民人有犯許旗人舉首地方官會同理事同知辦理至各省駐防營內居住之商民以及官兵僱用之人役均另編牌冊兼由理事同知查核

一屯居漢軍旗人戶婚田土事件俱歸所隸州縣管理一體編查保甲其丁憂起復報考以及查報家口檔冊除先行報旗查辦